

Ang Pulong Sa Dios Miabot Ngadto Sa Propeta  
William Marrion Branham

**“Pudyota Ang Imong Pangsulat Ug Pagsulat”**

*Usa ka gabii samtang ginakonsulta ko ang Ginoo, giingnan ako sa Espiritu Santo nga pudyoton ang akong pangsulat ug mosulat. Sa dihang gigunitan ko na ang pangsulat aron mosulat, gihatag kanako sa Iyang Espiritu ang usa ka mensahe alang sa iglesia. Buot kong dalhon kini sa inyo. May kalambigitan kini sa Pulong ug sa pangasaw-onon.*

Ania ang Akong ginapaningkamotan nga isulti sa inyo. Ang balaod sa pagpasanay mao nga ang matag kaliwat nagapanganak sumala sa kaugalingong matang niini, bisan pa sumala sa Genesis 1:11, “Ug miingon ang Dios, Magpaturok ang yuta ug balili, ug talamnon nga magahatag ug binhi, ug himunga nga mga kahoy nga magahatag ug bunga ingon sa ilang matang, diin anaa kaniya ang iyang binhi, sa ibabaw sa yuta: ug nahimo kini.” Unsa mang kinabuhi nga atua sa binhi mitubo nga usa ka tanum ug gikan didto nahimong usa ka bunga. Ang mao ra mismong balaod mao’y nagaaplikar sa iglesia karon. Unsa mang binhi nga nagsugod sa iglesia magatubo ug mamahimong sama sa orihinal nga binhi tungod kay kini ang

mao ra nga binhi. Sa niining katapusan nga mga adlaw ang matuod nga Pangasaw-onong Iglesia (ang binhi ni Cristo) moabot sa Pangulong-Bato, ug siya mamahimong ang pinakalabaw'ng iglesia, usa ka pinakalabaw'ng kaliwat, sa dihang siya'y pahiduol na Kaniya. Sila nga diha sa pangasaw-onon mamahimong sama na gayud Kaniya nga masusama na gani sila sa Iya mismong hulagway. Mao kini aron mahiusa ngadto Kaniya. Mamahimo na silang usa. Mamahimo silang pagkapinadayag mismo sa Pulong sa buhi nga Dios. Ang mga denominasyon (ang sayup nga binhi) dili makapamunga niini. Ilang ipamunga ang ilang mga kredo ug ang ilang mga dogma, nga gisagol sa Pulong. Kini nga pagsambog-sambog nagapamunga ug usa ka produktong hybrid.

Ang unang anak (si Adan) mao ang gilitok nga binhing-Pulong sa Dios. Gihatagan siya ug usa ka pangasaw-onon aron ipamunga pag-usab ang iyang kaugalingon. Mao kon nganong gihatag ang pangasaw-onon ngadto kaniya, aron ipabunga ang iyang kaugalingon; aron mamunga ug usa pa ka anak sa Dios. Apan nahulog ang maong babaye. Nahulog siya pinaagi sa pag-hybrid. Nahimo siyang hinungdan aron ang lalaki mamatay.

Ang ikaduhang Anak (si Jesus), nga usa pud ka gilitok nga Binhing-Pulong sa Dios gihatagan ug pangasaw-onon sama sa gihimo kaniadto kang

Adan. Apan sa dili pa nga mahimo Niyang minyoan siya, ang maong babaye nahulog usab. Siya, sama sa asawa ni Adan, gisulayan kung toohan ba niya ang Pulong sa Dios ug mabuhi, o duhaduhaan ang Pulong ug mamatay. Nagduhaduha siya. Gibiyaan niya ang Pulong. Namatay siya.

Gikan sa usa ka gamay nga pundok sa matuod nga binhi sa Pulong, gasahan sa Dios si Cristo ug usa ka minahal nga pangasaw-onon. Siya usa ka ulay sa Iyang Pulong. Siya usa ka ulay tungod kay wala siya'y nahibaloan nga mga kredo o mga dogma nga binuhat sa tawo. Pinasubay ug pinaagi sa mga miyembro sa pangasaw-onon mamatuman na ang tanan nga gikasaad sa Dios aron mahayag diha sa maong ulay.

Ang saad nga pulong miabot ngadto sa ulay nga si Maria. Apan kadtong saad nga Pulong mao Siya, Siya Mismo, aron mapadayag. Nadayag ang Dios. Siya, Siya Mismo, nagpamuhat niadtong panahona ug gituman ang Iyang kaugalingong saad nga Pulong diha sa ulay. Usa ka anghel ang naghatud kaniya sa maong mensahe. Apan ang mensahe sa anghel mao ang Pulong sa Dios. Isaias 9:6. Gituman Niya niadtong panahona ang tanan nga nahisulat na mahitungod Kaniya tungod kay gidawat sa maong babaye ang Iyang Pulong alang kaniya.

Higugmaon Siya sa mga miyembro sa ulay nga pangasaw-onon, ug maanaa kanila ang Iyang mga potensyal, tungod kay Siya mao ang ilang ulo, ug ang

tanan nga kagahum Siya ang nanag-iya. Napailalum sila Kaniya ingon nga mga miyembro sama sa atong mga lawas nga nakapailalum sa atong mga ulo.

Himatikdi ang maong panag-uyon sa Amahan ug sa Anak. Wala gayud gihimo si Jesus ug bisan unsang butang hangtud nga gipakita kini Kaniya una sa Amahan. Juan 5:19. Kini nga panag-uyon molungtud na karon tali sa Pamanhonon ug sa Iyang pangasaw-onon. Iyang ginapakita kaniya ang Iyang Pulong sa kinabuhi. Ginadawat niya kini. Wala gayud niya kini ginaduhaduhaan. Busa, wala gayu'y makapadaut kaniya, bisan pa ang kamatayon. Kay kon ang binhi mahimong itanum, patuboon kini sa tubig pag-usab. Ania ang sekreto niini. Ang Pulong anaa sa pangasaw-onon (sama niini kaniadto kang Maria). Aduna ang pangasaw-onon ug panghunahuna ni Cristo tungod kay nasayod siya kung unsa ang buot Niyang buhaton sa Pulong. Ginabuhat niya ang sugo sa Pulong diha sa Iyang ngalan tungod kay aduna kaniya ang “mao kini ang ginaingon sa Ginoo.” Gihatagan ug kinabuhi dayon sa Espiritu ang Pulong ug nagakatuman kini. Sama sa usa ka binhi nga gitanum ug gibisbisan, nagatubo kini hangtud nga anihonon na, ginatuman ang katuyoan niini.

Kadtong mga anaa sa pangasaw-onon ginabuhat lamang ang Iyang kabubut-on. Wala'y makapahimo

kanila ug gawas niini. Aduna kanila ang ‘mao kini ang ginaingon sa Ginoo’ o nagapabilin silang hilum. Nasayod sila nga gikinahanglan ang Dios kini nga anaa kanila ang nagahimo sa maong mga buhat, nga ginatuman ang Iyang kaugalingong Pulong. Wala Niya gihuman ang tanan Niyang mga bulohaton samtang nga dinhi pa Siya sa pang-yutan-on nga ministerio busa nagapamuhat Siya diha ug pinaagi sa pangasaw-onon. Nasayod ang pangasaw-onon niana, tungod kay dili pa kadto ang panahon alang Kaniya nga buhaton ang maong mga butang nga kinahanglan na Niyang buhaton karon. Apan Iya nang tumanon karon pinaagi sa pangasaw-onon kadtong buluhaton nga Iyang gibiyaan alang niining tukmang panahon.

Karon managbarog kita sama kang Josue ug Caleb. Ang atong maong yutang saad haduol na nga makita na sama kanila kaniadto. Karon ang Josue nagkahulugan ug “si Jehova nga Manluluwas,” ug siya nagarepresentar sa pang-katapusang panahon nga pangulo nga moabot ngadto sa iglesia sama usab kaniadto nga miabot si Pablo ingon nga orihinal nga pangulo. Si Caleb nagarepresentar sa kadtong mga nagpabiling matitud-anon kay Josue. Hinumdumi, gisugdan sa Dios ang Israel ingon nga usa ka ulay sa Iyang Pulong. Apan nagtinguha pa sila ug laing butang. Mao usab ang gihimo sa iglesia sa katapusang panahon. Himatikdi kung giunsa

nga wala gipaabante sa Dios ang Israel, o gitugotan siya nga makasulod sa yutang saad hangtud nga Iya na kadtong kaugalingong panahon nga gikatakda na. Karon mahimong gipiot sa mga tao si Josue, ang pangulo, ug nag-ingon, “Ato man ang maong yuta, adtoan nato ug kuhaon kini. Josue, human ka na, siguradong nawala na gayud ang imong pagka-sinugo, wala kana’y kagahum nga kanhi anaa kanimo. Kanhi kang makadungog sa Dios ug mahibaw-an ang kabubut-on sa Dios, ug sa madali nga magapamuhat. Adunay problema diha kanimo.” Apan usa ka pinadala sa Dios nga propeta si Josue ug nasayod siya sa mga saad sa Dios, busa gihulat niya kadto. Gihulat niya ang usa ka klaro nga desisyon gikan sa Dios ug sa miabot na ang panahon aron molihok, gipahimutang sa Dios ang kinatibuk-an nga kapangulohan diha sa mga kamot ni Josue tungod kay nagpabilin siya sa Pulong. Makasalig ang Dios kang Josue apan dili sa uban. Mao nga mahibalik kini pag-usab sa niining katapusang panahon. Sa mao usab nga suliran, sa mao usab nga mga pagpiut.

Kuhaon nato ang panag-ingnan nga atong makita diha kang Moises. Kining gamhanang dinihogan nga propeta sa Dios adunay usa ka pinasahing pagkahimugso, nga gipanganak sa hustong panahon alang sa pagluwas sa binhi ni Abraham gikan sa Egipto. Wala gayud siya nagpuyo sa Egipto aron

makiglantugi sa Kasulatan uban kanila, o aron makiglalis man sa mga saserdote. Miadto siya sa kamingawan hangtud nga ang katawhan andam na nga dawaton siya. Gitawag sa Dios si Moises ngadto sa kamingawan. Ang paghulat dili tungod kang Moises kondili tungod sa katawhan nga dili pa andam nga dawaton siya. Nagdahum si Moises nga masabtan sa katawhan apan wala nila nahisabtan.

Dayon anaa si Elias kang kinsa ang Pulong sa Ginoo miabot. Sa dihang nahuman na siya sa pagwali sa kamatuoran ug dili modawat sa Pulong kadtong grupo didto nga mao kaniadto ang mag-uuna sa Jezebel nga hugpong sa Amerika karon, gitawag siya sa Dios balik gikan sa maong natad ug gikastigo kadtong maong kaliwatan tungod sa pagsalikway sa propeta ug sa mensahe nga gikahatag sa Dios. Gitawag siya sa Dios paadto sa kamingawan ug dili siya mogawas bisan alang pa sa hari. Kadtong mga naningkamot nga haylohon siya sa paggawas, nangamatay. Apan nakigsulti ang Dios sa Iyang matinud-anon nga propeta pinaagi sa panan-awon. Gikan sa pagtago mitungha siya ug gihatud balik ang Pulong ngadto sa Israel.

Dayon miabot si Juan Bautista, ang matinud-anong mag-uuna ni Cristo, ang gamhanang propeta alang sa iyang panahon. Wala siya nag-eskwela sa tulonghaan sa iyang amahan, bisan sa tulonghaan sa mga Fariseo—wala siya misulod sa bisan unsang

denominasyon, kondili paadto sa kamingawan siya gitawag sa Dios. Didto siya mipabilin hangtud nga gisugo siya sa Ginoo nga dala ang mensahe, nga nagasinggit, “Ang Mesiyas nagasingabut na.”

Karon mokuha kita dinhi ug usa ka pasidaan subay sa Kasulatan. Dili ba sa mga adlaw kadto ni Moises kinsay gipanghimatud-an na sa Dios nga misukol si Kora ug misupak batok niadtong maong gamhanan nga propeta? Nakiglalis siya kang Moises ug nagpahayag nga siya aduna pu’y ingon nga katungod gikan sa Dios nga pangunahan ang katawhan ug nga ang uban aduna pu’y pinadayag Gikan sa Dios sama kang Moises. Iyang gisalikway ang awtoridad ni Moises. Karon ang mga tawo kaniadto, human nga ila nang nadungog ang matuod nga Pulong ug natino gayud ang kamatuoran nga ang usa ka matuod nga propeta gipanghimatud-an sa Dios, masulti ko nga kadtong mga tawo nalingla ni Kora ug sa iyang mga pagpakiglalis. Si Kora dili usa ka propeta subay sa Kasulatan apan ang kadaghanan sa mga tawo uban sa ilang mga kadagkuan midapig kaniya. Daw sa unsa ka susama sa mga ebanghelista karon nga uban ang ilang mga pang-kwartang paglingla nga sistema sama kang Kora. Maayo silang tan-awon sa mga tawo maingon nga maayong tan-awon si Kora kaniadto. Aduna sila’y dugo sa ilang mga agtang, lana sa ilang mga kamot ug mga banggiitang



magwawali sa entablado. Nanagtugot sila ug mga kababayen-an nga magwawali, ginapasagdan ang mga kababayen-an nga putlon ang ilang buhok, nagasuot ug pantalon ug mga syort, ug ginasayloan ang Pulong sa Dios alang sa ilang kaugalingong mga kredo ug mga dogma. Nagapakita kana kung unsay klase nga binhi ang anaa kanila. Apan dili tanan nga mga tawo misupak kang Moises ug mibiya sa Pulong sa Dios. Dili. Ang mga pinili nagpabilin kaniya. Mao usab ang nagakahitabo karon. Daghan ang nagapangbiya sa Pulong apan ang pipila nagapabilin niini. Apan hinumdumi ang maong samingay mahitungod sa trigo ug mga bunglayan. Ang mga bunglayan gikinahanglan nga bugkason na aron sunogon. Paduol na nga paduol ang pagbugkos sa mga iglesia nga nangbiya sa kamatuoran, andam na aron sa mga kalayo sa paghukom sa Dios. Apan ang trigo pagatigumon ngadto sa Ginoo.

Karon buot kong magmabinantayon kamo kaayo niini ug tan-awon kini. Gisaad sa Dios nga sa katapusang panahon ang Malaquias 4 mamatuman na. Kinahanglan mahitabo gayud kini tungod kay kini ang gihataga'g-kinabuhi sa Espiritu nga Pulong sa Dios nga gisulti sa propetang si Malaquias. Gihisgutan ni Jesus kini. Kini sa dili pa gayud nagaabot si Cristo sa ikaduhang higayon. Sa panahon nga si Jesus moabot na ang

tanang Kasulatan kinahanglan matuman na. Ang dispensasyon sa mga Gentil maanaa na sa katapusang kapanahonan niini sa iglesia sa dihang kanang mensahero sa Malaquias moabot na. Mamahimong tukma gayud siya sa Pulong. Dalhon niya ang tibuok Biblia gikan sa Genesis hangtud sa Pinadayag. Pagasugdan niya sa binhi sa serpente ug ipadayon hangtud sa mensahero sa ulahing ulan. Apan igasalikway siya sa mga denominasyon.

Igasalikway gayud siya tungod kay kana ang kasaysayan nga ginabalik ang kaugalingon niini gikan pa sa panahon ni Ahab. Ang kasaysayan sa Israel ilalum sa kamandoan kaniadto ni Ahab nagakahitabo na mismo dinhi sa Amerika sa kung diin motungha ang propeta sa Malaquias. Sama sa Israel nga gibiyaan ang Egipto aron mosimba nga may kagawasan, nga gipangpahawa ang mga lumad, nagtukod ug usa ka nasud uban sa halangdong mga lider niini sama kang David, ug uban pa., ug dayon nagpahimutang ug usa ka Ahab sa trono kauban ang usa ka Jezebel sa luyo niya aron mao'y momando, mao gyud usab ang gihimo nato sa Amerika. Ang atong kanhing mga ginikanan ningbiya paingon niining maong yuta aron mosimba ug magkinabuhi nga may kagawasan. Ilang gipangpahawa ang mga lumad ug giangkong ang kayutaan. Maisog nga mga kalalaken-an sama nila Washington ug Lincoln ningtungha apan pagkahuman sa

pipila ka panahon napulihan kining maong takus nga mga lalaki sa laing mga kalalaken-an nga ingon ka ubos ang kalidad nga wala magdugay napahimutang na ang usa ka Ahab diha sa lingkuranan pangpangulohan kauban ang usa ka Jezebel sa luyo niya aron mandoan siya. Sa ingon niining panahon nga sama niini nga ang mensahero sa Malaquias gikinahanglan moabot. Dayon diha sa ulahing ulan moabot ang usa ka pagpakigsangka sa maong Bukid sa Carmel. Himatikdi kini gayud ug maayo karon aron makita kini diha sa Pulong. Si Juan ang maong mag-uuna sa Malaquias 3. Nagtanum siya sa nahaunang ulan ug gisalikway sa mga organisasyon sa iyang panahon. Miabot si Jesus ug nagkaaduna ug usa ka pagpakigsangka sa Bukid sa Pagka-usab. Mangpugas ang ikaduhang mag-uuna ni Cristo alang sa ulahing ulan. Si Jesus mao'y mamahimong usa ka pagpakigsangka taliwala sa mga denominasyon ug mga kredo, tungod kay moabot Siya aron suportahan ang Iyang Pulong ug dalhon ang Iyang pangasaw-onon diha sa pagsakgaw. Ang unang pagpakigsangka mao ang Bukid sa Carmel; ang ikaduha mao ang Bukid sa Pagka-usab, ug ang ikatulo mamahimong mao ang Bukid sa Sion.

Ang talagasaong kinaiya nila Moises, Elias, ug ni Juan nga nagapahilayo sa mga tawo aron mag-inusara mao'y nakapalibog sa uban. Wala nila

masabtan nga kadto tungod nga ang ilang mga mensahe gipangsalikway. Apan nahipugas na ang binhi, human na ang pagtanum. Paghukom na kadto ang sunod. Nabuhat na nila ang ilang mga bahin ingon nga usa ka ilhanan ngadto sa mga tawo, busa paghukom na ang sunod.

Nagatoo ako sumala sa Pinadayag 13:16 nga gikinahanglan nang mohunong sa pagwali ang pangasaw-onon tungod kay ginamando na sa mapintas nga mananap ang pag-marka sa kamot o sa agtang kung ihatag man ang pagtugot sa pagwali. Dawaton sa mga denominasyon ang maong marka, kung dili mapugos nga hunongon na ang pagwali. Dayon ang Cordero moabot na alang sa Iyang pangasaw-onon ug hukman ang bantugan nga bigaon.

Karon hinumdumi nga si Moises natawo alang sa usa ka pinasahing buluhaton, apan dili niya mabuhat kadto nga buluhaton hangtud nga madawat na niya ang mga gasa nga mao'y mopahigayon kaniya sa pagbuhat sa maong buluhaton. Gikinahanglan niyang mopaingon sa disierto ug maghulat didto; adunay gitakda na nga panahon ang Dios. Magkaaduna kinahanglan ug usa ka maong Faraon sa trono, ug ang mga tawo kinahanglan nga moyangongo na alang sa tinapay sa kinabuhi, sa dili pa siya mahimong sugoon sa Dios pabalik. Tinuod kini alang sa atong panahon.

Apan unsa ang aduna kanato dinhi sa atong panahon? Daghang mga tawo ang nagapamuhat ug mga ilhanan hangtud nga aduna na kita'y henerasyon nga nangita na lang ug ilhanan nga gamay ra ang kahibalo o wala gyud mahitungod sa Pulong, o sa usa ka matuod nga paglihok sa Espiritu sa Dios. Kung makakita sila ug dugo, lana ug kalayo lipay na sila; dili na mahinungdanon kung unsa man ang anaa sa Pulong. Suportahan nila ang bisan unsang ilhanan, bisan kadtong mga dili subay sa Kasulatan. Apan gipasidan-an kita sa Dios mahitungod niana. Nagsulti Siya sa Mateo 24 nga sa mga katapusang adlaw ang maong duha ka espiritu halos magkapareha na ang mga pinili lamang ang masayod sa pagkalahi kanila, tungod kay sila ra gayud ang dili malimbungan.

Unsaon mo man pagkahibalo sa pagkalahi sa mga espiritu? Hatagi lang sila ug pagsulay diha sa Pulong. Kung wala nila ginasulti kana nga Pulong, iya sila sa maong dautan. Maingon nga nalimbongan sa maong dautan ang unang duha ka pangasaw-onon, paningkamotan niya nga limbongan ang pangasaw-onon sa katapusan niining panahon, pinaagi sa pagpaningkamot niyang ipa-hybrid sa pangasaw-onon ang kaugalingon niini

pinaagi sa mga kredong, o sa yanong pagtalikud lamang sa Pulong ngadto sa unsa mang ilhanan nga mauyonan niini. Apan wala gayud nagpahimutang ug mga ilhanan ang Dios nga nag-una pa sa Pulong. Nagasunod ang mga ilhanan sa Pulong, sama nga giingnan ni Elias ang babaye nga magluto una ug tinapay alang kaniya, sumala sa Pulong sa Ginoo. Sa dihang gituman niya sama sa giingon sa Pulong, ang hustong ilhanan miabot. Pagduol una ngadto sa Pulong ug bantayi dayon ang milagro. Ang binhi nga Pulong gihataga'g-kusog sa Espiritu.

Unsaon man sa si bisan kinsang mensaherong gipadala gikan sa Dios nga toohan lamang ang usa ka bahin sa Pulong ug isalikway ang pipila sa mga niini? Igapahayag sa matuod nga propeta sa Dios sa katapusan niining panahon ang tibuok Pulong. Kasilagan siya mga denominasyon. Mahimong ingon ka mabangis ang iyang mga pulong sama kang Juan Bautista nga gipangtawag sila ug mga bitin. Apan ang mga pinili nang daan magapaminaw ug mangandam na alang sa pagsakgaw. Ang Harianong Binhi ni Abraham, nga adunay parehong pagtoo sama kang Abraham magakupot sa Pulong kauban niya, tungod kay kauban silang gipili nang daan.

Ang mensahero sa katapusang panahon motungha sa gikatakda nang panahon sa Dios. Kini ang katapusang panahon na karon sama sa nahingsayran na sa tanan, tungod kay ang Israel atua na sa kaugalingong yuta niini. Sa unsa mang orasa karon moabot siya sumala ni Malaquias. Kung makita na nato siya, mamahimong hingpit nga matinud-anon gayud siya sa Pulong. Igapaila siya (igapahinungod diha sa Pulong, Pinadayag 10:7) ug panghimatud-an sa Dios ang iyang ministerio. Igawali niya ang kamatuoran sama sa gibuhat ni Elias ug mangandam alang sa maong pagpakigsangka sa Bukid sa Sion.

Daghan ang dili-makasabot kaniya tungod kay gikatudloan na sila sa Kasulatan diha sa usa ka pamaagi nga ginahunahuna nilang kamatuoran. Sa dihang tul-iron na niya kana, dili sila motoo. Bisan pa ang uban sa mga matuod nga mga ministro mamahimong dili-masabtan ang maong mensahero tungod kay daghan na kaayong gitawag sa mga malimbongon ingon nga kamatuoran sa Dios kuno.

Apan moabot kini nga propeta, ug maingon nga ang kanhing mag-uuna sa unang pag-anhi nag-singgit ug, “Tan-awa ang Cordero sa Dios nga nagakuha sa sala sa kalibutan,” mao man usab nga sa wala’y pagduhaduha mosinggit siya’g, “Tan-awa ang Cordero sa Dios nga nagaabot nga adunay

himaya.” Iyang buhaton kini, tungod kay sama kang Juan nga mao kaniadto ang mensahero sa kamatuoran ngadto sa mga pinili, mao man usab kining maong katapusang mensahero ngadto sa mga pinili ug sa pangasaw-onon nga nangatawo-sa-Pulong.”

(Gikan sa *Ang Kabatbatan sa Pito  
ka Mga Kapanahonan sa Iglesia*)

CEBUANO

©2015 VGR, ALL RIGHTS RESERVED

VOICE OF GOD RECORDINGS

P.O. Box 950, Jeffersonville, Indiana 47131 U.S.A

[www.branham.org](http://www.branham.org)



## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

**VOICE OF GOD RECORDINGS**

**P.O. BOX 950, JEFFERSONVILLE, INDIANA 47131 U.S.A.**

[www.branham.org](http://www.branham.org)